



# Icyegeranyo cy'amakuru y'imikino yaranze icyumweru

2023

Taliki 21–26 Nzeri



P.1 Rally : Karan Patel yegukanye "Rwanda Mountain Gorilla Rally 2023"

## Ijambo ry'ibanze

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'Imikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigitimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

## Ibirimo

- P1 **Rally** : Karan Patel yegukanye "Rwanda Mountain Gorilla Rally 2023"
- P2 **Amputee Football** : Habaye imikino y'umunsi wa mbere wa shampiyona
- P2 **Football** : Rayon Sports yanganyije na Al Hilal Benghazi mu mikino y'Afurika
- P3 **Swimming** : Abatoza 25 basoje amahugurwa y'uburyo bwo kurinda umukinnyi impanuka zo mu mazi
- P3 **Football**: Amavubi yasezerewe na Ghana mu gushaka itike y'imikino y'Afurika mu bagore
- P4 **Basketball**: Umwaka w'imikino wasojwe hakinwa umukino w'intoranywa
- P5 **Cycling**: Hatangijwe ku mugaragaro ibikorwa byo kwitegura shampiyona y'Isi 2025
- P6 **Volleyball** : Police VC na RRA VC zegukanye "Kirehe Open Tournament 2023"

Taliki 22 kugeza 24 Nzeri 2023 habaye isiganwa mpuzamahanga ry'imodoka "Rwanda Mountain Gorilla Rally 2023" aho Karan Patel ukomoka muri Kenya yitwaye neza akongera kwegukana iri siganwa ku nshuro ya kabiri yikurikiranya.

Iri siganwa ryitabiriwe n'imodoka 25, abasiganwa bakoresheje imihanda yo mu Karere ka Bugesera ya Gako, Gasenyi, Nemba na Ruhuha basiganwa uduce 11 dufite intera ya kilometero 175,56.

Karan Patel ukomoka muri Kenya wari wegukanye iri siganwa umwaka ushize wa 2022 yitwaye neza yisubiza iri rushanwa kuko aho yegukanye umwanya wa mbere akoresheje isaha 1, iminota 20 n'amasegonda 16, ku mwanya wa kabiri haje Jas Mangat (Uganda) wakoresheje isaha 1, iminota 20 n'amasegonda 33 naho ku mwanya wa gatatu haza Hamza Anwar (Kenya) wakoresheje isaha 1, iminota 25 n'amasegonda 46.

Mu bakinyi bari baserukiye u Rwanda, Davite Giancarlo ni we wasoreje ku mwanya wa hafi wa 4 aho yakoresheje isaha 1, iminota 35 n'amasegonda 8. Gakwaya Jean Claude yasoreje ku mwanya wa 6 (01h40'54"), Kanangire Christian Ngabo asoreza ku mwanya wa 8 (01h41'39") naho Kalimpinya Queen asoreza ku mwanya wa 18 (02h06'14").

Iri siganwa ry'uyu mwaka ryitabiriwe n'imodoka 25 hasoza 21 aho 4 zitashoboye gusoza.

Karan Patel nyuma yo kwegukana "Rwanda Mountain Gorilla Rally 2023" yahise azamuka ku rutonde rwa shampiyona y'Afurika aho yafashe umwanya wa kabiri ndetse anakuramo ikinyuranyo cy'amanota yarushwaga na Yasin Nasser.

Kuri ubu Yasin Nasser akomeje kuyobora urutonde n'amanota 93 akaba akurikiwe na Karan Patel ufite amanota 90 naho ku mwanya wa 3 hari Jas Mangat ufite amanota 87.

Irushanwa rikurikiraho rizabera muri Zambia, taliki 20 kugeza 22 Ukwakira 2023.



023 FIA African Rally Championship

Pos	Driver	ESP	KEN	USA	BDI	RWA	TZA	Pts
1	Yasin Nasser USA	0	24	38	24	15		93 pts
2	Karan Patel KEN	0	30	0	30	30		90 pts
3	Jas Mangat UGA	0	21	21	21	24		87 pts
4	Innocent Bwamiki UGA	0	0	18	18	17		55 pts
5	Prince Charles Nyerere TZA	0	0	0	17	18		36 pts
6	Rio Smith KEN	0	0	24	0	0		24 pts
7	Anwar Hamza KEN	0	0	0	0	21		21 pts

## Amputee Football : Habaye imikino y'umunsi wa mbere wa shampiyona

Taliki 24 Nzeri 2023 kuri Sitade ya Bugesera habereye imikino y'umunsi wa mbere wa shampiyona y'u Rwanda mu mupira w'amaguru w'abantu bafite ubumuga "Amputee Football Championship 2023-2024".

Mu bagabo hitabiriye amakipe 8 ari yo Nyarugenge, Rubavu, Musanze, Gatsibo, Muhanga, Karongi, Bugesera na Huye naho mu bagore hitabira amakipe 4 ari yo Nyarugenge, Ngoma, Nyanza na Musanze.

Imikino y'umunsi wa kabiri izabera mu Karere ka Musanze taliki 25 na 26 Ugushyngi 2023.

### Uko imikino yagenze

## Football : Rayon Sports yanganyije na Al Hilal Benghazi mu mikino y' Afurika

Taliki 24 Nzeri 2023, kuri Kigali Pelé Stadium habereye umukino ubanza mu mikino y' Afurika y'amakipe yitwaye neza iwayo "CAF Confederation Cup 2023-2024" wahuje ikipe ya Rayon Sports yo mu Rwanda na Al Hilal Benghazi SC yo muri Libya.

Muri uyu mukino ubanza wari wakiriwe na Al Hilal Benghazi ukaba nta bafana bemerewe, amakipe yombi yanganyije igitego 1-1. Ikipe ya Rayon Sports ni yo yafunguye amazamu ku munota wa 54, igitego cyatsinzwe na Héritier Luvumbu kuri penaliti. Ikipe ya Al Hilal Benghazi yabonye igitego cyo kwishyura ku munota 84 gitsinzwe na Ezzedinne Maryami.

Nyuma y'uyu mukino, taliki 30 Nzeri 2023 hateganyijwe umukino wo kwishyura nawo uzabera kuri Kigali Pelé Stadium i Nyamirambo. Ikipe izitwara neza izahita ikomeza mu matsinda y'imikino y' Afurika.

### 2023-2024 AMPUTEE FOOTBALL CHAMPIONSHIP PHASE ONE



MEN RESULTS			
HUYE	6-0	BUGESERA	
RUBAVU	3-0	GATSIBO	
MUHANGA	0-7	NYARUGENGE	
MUSANZE	2-0	KARONGI	
BUGESERA	0-8	NYARUGENGE	
MUSANZE	1-0	HUYE	
KAMONYI	1-0	GATSIBO	
RUBAVU	9-0	MUHANGA	



WOMEN RESULTS			
NYANZA	0-1	MUSANZE	
NYARUGENGE	3-0	NGOMA	
NYARUGENGE	1-0	MUSANZE	
NGOMA WOMEN	0-1	NYANZA WOMEN	

P	Team	P	W	D	L	F	A	D	Pts
1	Nyarugenge	2	2	0	0	15	0	15	6
2	Rubavu	2	2	0	0	12	0	12	6
3	Musanze	2	2	0	0	3	0	3	6
4	Huye	2	1	0	1	6	1	5	3
5	Karongi	2	1	0	1	1	2	-1	3
6	Gatsibo	2	0	0	2	0	4	-4	0
7	Bugesera	2	0	0	2	0	14	-14	0
8	Muhanga	2	0	0	2	0	16	-16	0



**3 Swimming : Abatoza 25 basoje amahugurwa y'uburyo bwo kurinda umukinnyi impanuka zo mu mazi**

Taliki 08 kugeza 22 Nzeri 2023, ku bufatanye bw'ishyirahamwe ry'umukino wo Koga ku Isi "World Aquatics", Komite Olempike y'u Budage, Komite Olempike y'u Rwanda n'ishyirahamwe ry'umukino wo Koga mu Rwanda "RSF" hateguwe amahugurwa yari agamije guha ubumenyi abatoza ku buryo bwo kurinda umukinnyi impanuka zo mu mazi "Drowning & Prevention".

Aya mahugurwa yitabiriwe n'abatoza 25 bari bahagarariye amakipe 10 agize RSF yatanze na Sven Spannkrebs, wavuye muri Komite Olempike y'u Budage.

Abitabiriye amahugurwa baturutse mu makipe atandukanye arimo Les Dauphins SC, Rubavu SC, Aquawave SC, CSK SC, Mako Sharks SC, Gisenyi Beach Boys SC, Rwamagana Canoe & Aquatic Sports SC, CS Karongi SC, Rwesero SC na Vision JN SC.



**Football: Amavubi yasezerewe na Ghana mu gushaka itike y'imikino y' Afurika mu bagore**

Taliki 26 Nzeri 2023, ikipe y'u Rwanda yasezerewe na Ghana mu mikino y'ijonjora rya mbere mu gushaka itike y'imikino y' Afurika mu mupira w'amaguru mu cyiciro cy' abagore "Women's Africa Cup of Nations 2024".

Ikipe y'u Rwanda yatsinzwe na Ghana ibitego 12-0 mu mikino yombi. Umukino ubanza wabereye kuri Kigali Pelé Stadium, taliki 20 Nzeri 2023, Ghana yatsinze u Rwanda ibitego 7-0 naho umukino wo kwishyura wabereye Accra Sports Stadium, taliki 26 Nzeri 2023 urangira Ghana itsinze u Rwanda ibitego 5-0.

Nyuma yo kwitwara neza, Ghana izahura na Namibia mu ijonjora rya nyuma, ikipe izitwara neza ibone itike y'imikino ya nyuma y' Afurika izabera muri Maroc.

Uko andi makipe azahura, Senegal izakina na Misiri, Mali na Guinea, Nigeria na Cape Verde, Algeria n'u Burundi, Equatorial Guinea na RDC, Tanzania na Togo, Kenya na Botswana, Tunisia na Congo Brazza, Angola na Zambia ndetse na Burkina Faso na Afurika y'Epfo. Amakipe 11 ni yo azabona itike ziyongere kuri Maroc izakira irushanwa.



Taliki 23 Nzeri 2023 ni bwo hasojwe umwaka w'imikino wa 2022-2023 muri Basketball hakinwa umukino w'abatoranyijwe mu bitwaye neza mu cyiciro cy'abagabo "FERWABA All-Star Game 2023".

Aba bakinnyi batoranyijwe bari bagabanyijwemo amakipe 2 harimo ikipe yari iyobowe na Nshobozwabyosenumukiza Jean Jacques Wilson" Team Nshobozwa" ndetse n'iya Turatsinze Olivier usanzwe akinira Espoir BBC "Team Turatsinze".

Uyu mukino wabereye muri BK Arena warangiye Team Nshobozwa itsinze Team Turatsinze amanota 99 kuri 98.

Fulla Nganga wari muri Team Nshobozwa ni we wabaye umukinnyi witwaye neza muri uyu mukino. Fulla usanzwe ukinira APR BBC yahembwe ibihumbi 500 by'amafaranga y'u Rwanda.

Mbere y'uyu mukino habayeho no kurushanwa gutsinda amanota atatu ndetse no gutsinda umukinnyi akoze mu nkangara "Slum Dunk".

Mu bagabo, Munyeshuri Thierry ukinira Kigali Titans yahize abandi mu gutsinda amanota atatu, DonDon Elisée ukinira Espoir BBC ahiga abandi mu gutsinda amanota akoze mu nkangara "Slum Dunk" naho mu bagore, Micomyiza Rosine ukinira REG BBC ni we wahize abandi mu gutsinda amanota atatu. Aba bakinnyi bose bahembwe ibihumbi 500 by'amafaranga y'u Rwanda.

Muri uyu mukino kandi, Kami Kabange akaba ari umukinnyi wa REG BBC n'ikipe y'igihugu mu bagabo yasezeye gukina nk'uwabigize umwuga nyuma y'imyaka 23.

Ibirori byo gusozwa umwaka w'imikino wa Basketball byasojwe n'igitaramo cyarimo abahanzi batandukanye bo mu Rwanda nka Kivumbi King na Nasty C na Cassper Nyovest bo muri Afurika y'Epfo.



**FERWABA ALLSTAR GAME CONCERT 2023**

TEAM TURATSINZE		TEAM NSHOBOZWA	
NOIZEYE DIEUDONNE	NIYUNGEHO J. DE DIEU	ADONIS FILER	MUHAYUMUKIZA ERIC
WAMUKOTA BUSH	IRUTINGABO FISTON	FULLA ROLLY	SHYAKA OLIVIER
HAGUMINTWARI STEVEN	BUGINGO K. HUBERT	KAJE ELIE	MUNYESHURI THIERRY
MUHIZI PRINCE	PODO CALEB	KAMNDOH FRANK	KALISA BRIAN
KIMASA DAN	MUHOZA FABRICE	NIYONKURU PASCAL	DONDON ELISEE
BELECK BELL		NSHIZIRUNGU PATRICK	
HEAD COACH MURRAY DEAN	ASSISTANT COACH MAXIME MWISENZA	HEAD COACH HENRY MWINUKA	ASSISTANT COACH NKUSI KARIM

Taliki 21 Nzeri 2023 muri Kigali Convention Centre habereye umuhango wo gutangiza ku mugaragaro ibikorwa byo kwitegura shampiyona y'Isi y'umukino w'amagare "UCI Road World Championships" izabera mu Rwanda mu mwaka wa 2025.

Iki gikorwa cyari kiyobowe na Minisitiri wa Siporo, Munyangaju Aurore Mimosa, Umuyobozi Mukuru mu ishyirahamwe ry'umukino w'amagare ku Isi "UCI", Amina Lanaya, Perezida w'agateganyo w'shyirahamwe ry'umukino w'amagare mu Rwanda "FERWACY", Kayirebwa Liliane ndetse na Niyonkuru Zephane usanzwe ari Umunyamabanga Uhoraho muri MINISPORTS akaba ari we ukuriye Komite itegura shampiyona y'Isi 2025.

Shampiyona y'Isi ya 2025 izaba ibereye bwa 1 muri Afurika yitezwe abantu ibihumbi 20 barimo abakinnyi, abatoza n'abayobozi bagera ku 5000.



Taliki 23 na 24 Nzeri 2023 mu Karere ka Kirehe habereye irushanwa mu mukino wa Volleyball "Kirehe Open Tournament 2023". Iri rushanwa ryegukanwe na Police VC mu bagabo naho mu bagore ryegukanwe na RRA VC.

Iri rushanwa ryabaye ku nshuro ya 3 ryari ryitabiriwe n'amakipe 7 mu bagabo aho yari yashyizwe mu matsinda abiri, itsinda A ryari ririmo Kirehe VC, Police VC na KVC naho itsinda B ririmo Gisagara VC, REG BBC, Kepler VC na APR VC.

Mu bagore hari hitabiriye amakipe 3 ari yo Police VC, RRA VC na IPRC Kigali.

Mu bagabo, Police VC yegukanye igikombe itsinze Gisagara VC amaseti 3-1 (16-25, 25-23, 25-19 na 25-20). Ikiye ya APR VC ni yo yegukanye umwanya wa 3.

Mu bagore, ikipe ya RRA VC yegukanye igikombe itsinze ku mukino wa nyuma Police VC amaseti 3-0. Ikiye ya IPRC Kigali ni yo yegukanye umwanya wa 3.

Ikiye ya mbere muri buri cyiciro yahembwe miliyoni 1 y'amafaranga y'u Rwanda, iya kabiri ihabwa ibihumbi 700 iya gatatu ihabwa ibihumbi 500.





**RWANDA**  
Olympic rings logo



**commonwealth**  
**games**  
**RWANDA**

Website: [www.olympicrwanda.org](http://www.olympicrwanda.org)

[www.olympicrwanda.org/commonwealth](http://www.olympicrwanda.org/commonwealth)

Email: [cnosr@olympicrwanda.org](mailto:cnosr@olympicrwanda.org) |     @RwandaOlympic

Address: Remera–Hallmark Center Building KG 17 Ave